

四庫全書

集部

欽定四庫全書

集部

樊榭山房集卷三

詳校官侍郎

臣謝墉

助教

臣常循覆勘

總校官

庶吉士臣朱

銓

校對官

中書臣程

琰

謄錄進士

臣沙重輪

欽定四庫全書

樊榭山房集卷三

錢塘厲鶚撰

詩丙

相國寺訪亦諳上人

以下  
癸卯

吾師諸行苦白足辭南屏洗盥入城市破寺風泠泠昏  
旦塵一聚不見芙蓉青閉戶即邱壑自性非殊形許由  
未聞道棄瓢徒內焚耳非駐聲器無耳寧無聽晚樹下

落日龕燈冷於螢孤情出秀句勿事重翻經

春雨夜坐

春懷憺無豫多雨境亦適平生遠遊心中歲但荒寂卧  
聞簷間溜時作幽泉滴影事詎可追新愁何用覓正復  
念梅花高樓一聲笛

雨中同符幼魯聖幾汎舟河渚看梅暮至西溪

春山始可游逢雨成奇矚亂水添魚梁奔雲出幽谷低  
蓬何所詣蕩漾轉深曲回瞻雲峯遠前與花林逐寒姿

媚荒筠一一事膏沐因依遠人境搖動淪漪綠客有解  
清琴雨深音斷續暝色入孤絃風燈溼茅屋去舟尚躊  
躇花光看不足

宿永興寺德公山樓

昏黑山雨歇一徑松烟蒙微聞梅花氣吹落疎磬中詎  
惜衣履溼宿處投支公凭樓荅人語迴與雲際同少選  
沈靄斂俯聽幽林風明星忽三五挂在殿角東短燭照  
春綠夜靜山逾空觀河悟衆象拂石期冥鴻神清了無

夢亂壑流何窮焚香以達曙茲焉悅微躬

同作

錢唐符曾幼魯

空山行晚雲褐衣溼春雨昏際人漸希杳靄入深路  
曲磴伏潜流叢篠紛交護到寺僧相迎把火話曩素  
雨止鐘亦殘星光出幽樹境異心頓開魂清跡偕赴  
夜窗覓山影影忽落如霧亂耳百松聲鏘然奏韶護  
清極本無寐有夢亦同趣至曉重僮僂烟華想流注  
永興寺二雪堂曉起看綠萼梅是馮具區先生手

種

幽人先鳥起林磴正寂然是時春空霽山翠爭便娟的  
的花間雨澹澹花上烟烟雨為合離花態亦變遷祭酒  
昔游此手種猶生前傲兀根倚石歌倒枝暎泉微馨委  
陳跡高格同枯禪儒官罷亦得不廢招隱篇攀花久延  
佇世已無其賢

溪上巢泉上作

翫溪遂窮源東峯屢向背朝日上我衣春泉淨可愛不

知泉落處潺潺竹籬內喧聞兩疊瀉靜見一潭匯松風  
颭纖碧花影蓄深黛名言猶有相幻照乃無悔悠然巢  
居心頗欲終年對

秋雪菴

菴在水中四面皆蘆深  
秋花時彌望如雪故名

夙知秋雪佳契闊三歲周今來際春初還有秋雪不曲  
港迷進艇花源信回流稍深天影展四顧雲水幽弱穠  
未拆土髭柳空依洲息心歸淨域彈指開香樓所得殊  
寂寂無營諒悠悠此日樂莫樂觀生侶輕儵



栢家園行三四里皆竹樹梅花中

遵塗抱町畦緣林窺嵒嶸古屋氣始暄閒園地常潔梅  
竹素所饒衣食理未缺既得長子孫還以資妍悅叢叢  
綠雲外斜陽照花雪烟影望自深風香渺難說行吟覲  
歸禽安居務新節暫游如久棲悵與清景別

晚入石人塢還永興寺

撥蘿尋微徑山意黯將暮幽討忘體疲窈窕入深塢激  
瀨不通人踏石凡屢渡返景忽難留蒼蒼目爭赴萬竹

金人集卷三  
皆為風千花并成霧去鳥有遺音歸樵詎同趣夕梵懷  
信宿春溪延緩步入門不生月仍倚簷際樹

春日汎舟北郭

出郭逢初霽蓬窗任意凭氣新如有獲興到亦無朋遠  
水浮春寺青山落晚暈為憐桃李色歸待月東升

春寒

漫脫春衣浣酒紅江南三月最多風梨花雪後酴醾雪  
人在重簾淺夢中

綠陰

幽人與時鳥共喜綠陰成一徑千林暗斜陽片雨晴臨  
池想康樂繞屋咏淵明即此忘春去悠然悟達生

雨後坐孤山

林巒幽處好亭臺上下天光雨洗開小艇淨分山影去  
生衣涼約樹聲來能耽清景須知足若逐浮名媿不才  
誰見石闌頻徙倚斜陽滿地照青苔

夏日閒居

畏景何堪出風前卧簟斜樹陰連別徑草色入隣家舊  
業閒來廢禪心病後賒今年飢似朔不擬上公車

湖心亭大風快涼得絕句二首

西北雲多失柳陰快風特地埽煩襟不成飛雨闌干外  
涼殺沙邊兩睡禽

湖上青山深幾重紛然幽綠舞長松何人為喚昭華手  
橫笛吹驚水底龍

清平山精舍納涼

崖上緣修竹城南界小天幾人來亦偶六月興尤偏江  
遠平看鳥窗虛俯聽蟬清風惜不得借與客堂眠

七月六日立秋送陳授衣之廣陵

作客畏逢秋君今詎不愁五湖飛一葉七夕在孤舟殘  
暑過江少涼螢逐暝流歐公堂外柳為訊舊同游

金以寧齋中觀蘇漢臣埽象圖

西域乘象利戰攻南越貢象趨華風趙家山河已幅裂  
欲圖王會誰能同當年明裡教車象象院驅來列成兩

吳自牧夢梁錄明禋年教習車  
象車後大象二頭觀者如堵

開封蘇郎設色殊寫出

笑過閭令上貝多樹底風泠泠蠻奴馭象惟使令黏香  
似是孔雀帚瀉水但用頻伽餅高僧侍者狀奇詭作禮  
蕃王喻微旨蹴踏能將大力馴埽除不使纖塵累西域  
之象南越無六牙四足蓮花敷畫院良工具深意調服  
強敵如斯夫君家此圖傳自昔仍在錢唐睹奇跡裁詩  
復共小低頭香斷空齋山月白

中秋對月懷都下故人

玉宇無窮望眼寬  
不辭清露溼杯盤  
秋來南國宜高卧  
月傍東城得早看  
豆葉響回三徑靜  
桂花風入二毛寒  
誰招遮日長安手  
直到天明共倚闌

秋夜聽潮歌寄吳尺鳧

城東夜月懸羣木  
洶洶濤聲欲崩屋  
披衣起坐心茫然  
秋來此聲年復年  
壯心一和小海唱  
二毛不覺盈吾顛  
胸中雲夢吞八九  
要挽天河斟北斗  
倏忽晴空風雨來  
杳冥水府神靈走  
時哉會見滄溟立  
自是乾坤有呼吸

軒轅張樂萬耳聾洞庭天遠魚龍泣須臾聲從靜裏消  
一蜚獨語星蕭蕭天明作歌寄吳子想子中宵亦聽潮

張東扶移居瑞石山麓

昔君買宅時城西數相見藥闌碧逶迤書窗淨于練意  
復厭喧卑擇隣猶未善栗果多博徒出入須障面愛此  
城南山翠遂深巷轉張南與周北戶戶事筆硯高楓紅  
一林奇石青數片留雲罷香爐賓月橫琴薦語我色忻  
忻邀我意眷眷我賃東皋居有若營壘燕差得水三分



無山讓君先里鮮可語人閉門俗自遣過存近亦稀頗  
不費茶串連牆恨未能來往共歲晏

初寒著敝羊裘戲作

一領尫茸歷十霜西風重見出空箱忍寒貰酒無多直  
穿袖吟詩定幾章敗絮何慚擁王霸險衣今笑裏周郎  
漸看不隱山肩瘦萬丈虛言蓋洛陽

冬日同東扶游鳳凰山

故宮何足問佛宇亦摧殘本以塵緣幻來將道眼看江

山迎小雪竹樹逼清寒雙雀尋苔啄飛飛下井闌

楊貞女詩

楊氏有貞女窈窕年初笄  
英英司馬孫喬木無卑枝  
明心兼秀質說禮復敦詩  
行媒得快壻許嫁亦不遲  
何郎薊門死女聞涕漣  
而上堂告父母聽女前致詞  
女幼習詩禮大義或少窺  
古稱未亡人鮮有不結褵  
若女而不婦佗適無相訾  
此語衆苟同女心難自欺  
許身等珪璧親命詎易移  
匹如壻貧落夙諾無參差  
貧且不可背死

乃忍背之女心抱微尚奚取鄉國知當歸何郎家再拜  
從此辭父母聞之泣咄咄事大奇汝有松柏心吾亦不  
汝乖桂楫青絲紉相送於河廩吳閭三百里雲水天一  
涯本意曲顧歸竟為同穴期入門拜尊章毀容披素帷  
身是女貞木淚作寡女絲死當化王睢生當號長離

雨後寫望

風敲病葉入疎櫺雲破寒山數筆青十日鼓琴晴始出  
夕陽依舊滿迴汀

贈韓大自為

金粟風流久絕羣  
弁陽今復見夫君  
梨花萬樹營生壙  
自說佗時葬白雲

嚴朗屋寫小像為杜子春事索題四首

長安遊戲倦風埃  
論到錢愚劇可哀  
脫手紫標三百萬  
杜郎俠骨本仙才

雲臺峯頂約驂鸞  
杞犬芝童覓最難  
上界曾聞足官府  
囊空不贖一錢看

丹砂成土髮成絲月下空封六一泥畢竟求仙因藥誤  
被紉飲酒是男兒

君如夷甫不言錢卻采虞初入簡編歸去但尋梅尉女  
挑燈細話小游仙

閒居和丁敬身

徑有青蘼石有衣不嫌蕭瑟與心違隣燈明處先穿樹  
山雨來時自打扉營室差能學劉峻養痾多為擬王微  
灾年杞菊收猶薄且辨蒲覓切晨興小忍飢

寄徐丈紫山嶺南

此別驚垂老初鴻有信傳  
勤收駐顏藥儉用賣文錢  
鄉

夢過梅嶺吟情寄竹田  
歸裝定何日目極浙江船

漢書南越

處篁竹之中師古注篁竹田也

雨夜聞雁

燈花不向雨中開  
擁被愁聞雁叫哀  
深黑雲天箏柱落  
昏黃庭院榜聲來  
誰家關塞書難寄  
到處江湖羽易摧  
甚欲孤蓬南浦宿  
殘蘆滴響夢驚回

哭王源村丁茜園二首

平生師友十年間，雪月花時記往還。  
原季長貧成白首，應劉俱逝託青山。  
篋多遺藁從人取，室少孤兒信命慳。  
北郭西橋同此恨，笛中先後淚潺湲。

賈生賦裏嘆浮休，欲再為歡挽不留。  
練日人間誰會葬，傷春地下必相酬。  
谷音寂寂雲無色，神理緜緜水自流。  
兩地明年作寒食，棠梨零落一般愁。

金壽門過訪，以詩卷索拙序，茶話良久，殊慰寒寂。

爾我相看已壯夫，恒河照影昔游徂。  
江山興好朋尊隔，羅綺年來一字無。  
折腳鐺邊殘葉冷，缺脣餅裏瘦梅孤。  
只應絕調艱為序，卷卷淹留類賈胡。

餅菊和丁敬身

翦供寒花霜露餘，琴牀筆格暎森疎。  
徑松荒後為餅隱，山杞持歸伴水居。  
影畫銘心燈耿耿，夢香養鼻蝶蘼蘼。  
幽人服食宜清苦，留得風標一起予。

懷亦諧上人游鄧尉



城中數覓不相遇阿師始是心出家寫經坐沈木漬雨  
負杖吟過銅坑花天寒正覺五湖遠歲去那用雙手遮  
窗前舊竹亦可念一兩三莖曲復斜

東扶送水仙花五本時臘月七日雨中

春忠於花亦太廉一花一葉一愁添肉人不合尋常見  
燈影娟娟雨半簾

題沈藥城歌詩圖

戍削春衫瘦更妍故持樂句近君前玉溪比日風情減

難擬清歌沈下賢

汪青渠營土橋精舍去予居二里許雪中過之不

值題壁二首

近得林中侶堪為雪裏行  
玉川雙破屋東郭兩先生  
積素微封徑寒雲半入城  
白鷗吾與汝一笑眼俱明

竟日空亭坐遲君開板扉  
幽禽吟凍雪風竹發清機  
孤趣忽自悅遠言相與違  
昔人翻興盡容易剡中歸

寒夜同沈藥城杭大宗集趙功千二林吟屋分詠

歲除節物二首

膠牙餠

節物關人意殘年一櫟添蓼花分點綴粉繭共羈黏俗

嗜難頤解微甘使口箝不妨吾舌在蜜味得相兼

陸放翁詩

新煤餠枝  
綴蓼花

糝盆

糝盆宋時亦呼生盆  
見劉昌詩蘆浦筆記

屈指開爐後生盆即漸催紅飛松葉火白壓豆豔灰列

屋明通夕深廳聒一回兒童應未覺扶暖上簷梅

同樂城耕民游艮山山在城東北高可二丈許蓋  
土阜也旁列古松三四晚風肅然殘雪在地卧殘  
碑已中斷讀之不甚了了乃元艮山土神廟碑大  
德己亥紹興路儒學錄古杭沈德章記并書廟不  
知毀於何時作詩紀之

皋亭雪未消數峯聚可數城陰艮其背有此山戴土牽  
拂無事朋共探風物古晚寒閉漁村斜陽入蔬圃疎松  
時一響似喜我輩撫徘徊去仍留斷碑記祠宇惟存緒

兒年髣髴辨某甫斯人今安在閱世如過羽社翁一尊  
酒寂寞罷歌舞明年梨花時再尋比韋杜沙河春水生  
看客曳柔櫓

歲除日同王雪子吳耕民放舟湖上入南山作

路入南屏葑草荒冷雲閒鷺兩相將岸痕倒樹生新水  
塔影留人戀夕陽春八九分來鼎鼎年三十二去堂堂

青山似欲償詩債著意湖邊列雁行

白樂天詩何況纔  
中年又過三十二

春來

以下  
甲辰

忽忽燈期過春來只惘然花開貧酒戶草長舊情田小  
檻拋書坐幽窗背月眠無人知此意語鳥漫相憐

題盛嘯厓樵秋圖

秋碧有聲霜紅有色山寒不欺徑仄不惑一耒而耕一  
船而漁行吟負薪孰云非夫如困之石亦介其守予肩  
則頽予顏則否籬延于菊門隱于莎曷歸乎來勞者遂  
歌

溪上巢懷去年與幼魯同游

山行有常期即事感今昨春候雜暄淒人心異所託獨  
為泉上吟坐聽鳥聲落鏡我塵土顏竹木影參錯我友  
支許流往者共斯樂去矣渺川原懷哉悵猿鶴幾人京  
華游能不廢邱壑擬宿贊公房夢尋煮茶約

石佛菴贈敏上人

釋子吾宗秀新詩似白雲開門一花落繞屋百泉分定  
老烟蘿色悲同魚鳥羣塵中漫回首清話幾時聞

元詩  
僧白

雲英上人唐侍  
御元之後也

沈大匡先生華山草堂

心跡竟沈淪空山閔古春亭留唐野史名在宋逋臣破  
壁全題字雙松一作薪惟應千載上媿殺瘦腰人

西溪梅花已殘永興寺綠萼二株正盛開

春風十日怒於虎香雪紛紛落成土我來恨與花慙期  
嬾逐閒雲入花塢一笑逢此萼綠華冷寺空庭相媚嫵  
林端初日開烟霏曉曜鮮妍世希睹花雖無言酬以意  
為待幽人來作主幽人與世實寡營捷足纖兒每工侮



目成色授不嫌遲卻月臨風更須譜空香入磬韻微茫  
枝格橫苔影交午為花不惜三日留隔竹一聲啼翠羽  
二月十七日重游洞霄宮探大滌洞天

振衣浴罷體更輕竹杖投石聲彭觥空山昨夜龍洗窟  
雨過萬壑泉縱橫山靈知我有默禱故遣松風作前導  
一峯陰見一峯晴天柱中央翠於埽元同先生昔隱居  
洞天長鎖琅函書前游日夕未曾到恨身不得乘輶車  
穿盡幽篁履苔石驚見谿研洞門坼童子曾為擣藥禽

桃花解笑題詩客此中日月停兩九想像九夏尤清寒

微明秉炬觸暗壁古靈題字來尋看

洞中題刻多漫滅但見一處云陳襄

述古來玲瓏乳竇隔凡處路接華陽不歸去有人問我  
矣已夏

洞中來為說浮雲如柳絮

功千見示劉松年溪山樓閣圖用坡公集中韻

淳熙小字藏石邊絹素微裂凝塵烟暗門劉郎呼欲出  
鶴歸城郭應悽然劉郎自具擘山手斷續飛下雲中泉  
重樓面勢各相背地非輞口非樊川蔽虧綠樹露小閣

水紋山影闌干前消搖白日不待遣倚枰二叟全其天  
尋詩一老獨有意目送去鳥窮幽妍尤工遠勢寫村落  
背崦或有桑麻田丹青不讓李晞古金碧直壓趙大年  
畫史筆力在盤礴無取小景爭便娟闔門聽雨品字坐  
焚香埽地曲尺眠落花將春作昨夢主人與客俱列仙  
只愁青壁太斗絕畫裏欲學猿猱緣莫言此畫非我有  
他日想見哦長篇

同張東扶石貞石游雲居寺禮中峯和尚髮塔

幽磴無人行露蘚綠相待倚山為女牆春物見爽塏叢  
深鳥嚶嚶沙崩石磊磊長廊據寺勝酌泉散憂癘恭聞  
大導師出畔藏落彩唐淨業法師塔銘高宗忌辰方階落彩作禮向閒房  
真風故常在選樹坐移陰仰看雲意改游雲忽東南還  
心渺江海

同作

上虞  
石文貞石

春雨回荒姿餘寒晴復陰逶迤步石徑禪室來幽尋  
衆山已秀發綠淺未滿林繞寺雉堞壯入門臺殿森

阿師久西去遺履猶至今妙相渺難睹默契情更深  
合十向雲際恍聞淨土吟四體豈無愛諸妄惟滅心  
緬彼紺螺色香土歲月沈但餘烟草碧如絲緣塔侵  
平生慕禪意苦為飢火燭焉知此僻境修廊靜惛惛  
閒閒湖上景悠悠南山岑鉏聲徧芳野微風忽鐘音  
暫憩殊有會虛寂歸沖襟

題沈啟南冷泉亭圖次韻

石潤林香下夕暉風中似有磬聲微好山招隱貧難買

妙畫通靈久亦飛題字尚留前輩在聽泉今見解人稀

頻年不踏松陰路卧以游之恰忘歸

圖向為靈隱僧房物後歸龔田居侍

御今歸趙君功千上有吾杭劉邦彥吳江汝其通并啟南自題詩

同作

錢塘沈嘉轍樂城

為看詩畫攬清暉遐想當年結思微古木千章陰乍  
合寒泉一道雪橫飛風流已往誰能續墨瀋猶香知  
者稀曾憶晚來成醉後一亭烟靄見僧歸

又

錢塘吳焯尺牘

晨坐高齋竟落暉祇因讀書悟幽微聽來畢靜水生  
響看到出神峯欲飛往事重題增感慨舊游如夢記  
依稀回思羣屐經行處空惱耕烟閣筆歸

田居侍御  
曾屬王石

谷臨  
募

同沈藥城吳尺鳧趙功千登六和塔

江行安微風回泊龍山下羣峯勢蜿蜒茲塔獨凌跨何  
年劫燒餘突兀入窗赭同游三數人綠陰愛僧夏層梯  
入大幽初級見頗寡攬身盤空雲江色向我瀉三折之

字流隨山動平野東矚窮剡源西眺思沙社帆檣閱興  
衰魚鳥被風雅萬古一斜陽欲玩不堪把塔中有金仙  
詎是無情者

洗心亭看竹

遮簷萬玉翠森森迴合空潭倒影深若似此君何用洗  
多生無垢亦無心

宿雲棲寺

入林人語忽尋烟來共堂頭此夜禪本色住山深有味



清詩呈佛豈無緣竹龍行水風回後栗鼠窺星月出前  
不待諸天訶放逸心清坐聽曉鐘傳

本色住山見惠洪  
林閒錄貫休詩云

得句先  
呈佛

### 次韻答石貞石雨中見懷

便作神仙亦號頑日長無客共蕭閒鬱洲家似邴根矩  
退谷銘如元次山水鳥求魚衝葦外幽花綠竹出牆間  
城東若役高人夢帶雨籬門未上闌

來詩有夢落城  
東水竹間之句

### 梅雨經旬得遣懷絕句六首

小樓高處看雲奔銀竹千條挂畫昏不道去年池水竭  
碎萍猶未浸薤根

欲出并無下澤車此生難得是三餘焚絲不斷簷前瀑  
如在匡山讀故書

龍公一朶破慳多即漸空原展綠波十角吳牛三尺筆  
棟花點點響烟蓑

久將脣舌薄君卿深掩柴荆罷送迎穉竹高槐皆雨立  
忽然放出夕陽明

舊種垂楊綠埽磯北風將雨上漁扉前村半入空濛裏  
雲帶炊烟溼不飛

手疎名士離騷酒眼避高僧競渡船一笑茅堂作重午  
自鉏昌本煮清泉

立秋日同馬丈碧滄汪青渠松泉上人遊惠山舟  
中口占

綠楊深似雨港曲覆移舟停扇聽僧語西神山正秋  
惠山聽松菴觀王孟端竹爐詩畫卷次吳文定公

韻

舍人雅尚寄名泉為愛山僧手自煎  
餅響風中無雨外  
水評陸後更張前  
空寮只許茶人住  
一榻翻同竹祖眠  
三百年來留寶墨  
簫材無恙是天全

廣陵秋夜聞絡緯

清月出三更重露零  
百卉空堂風騷騷  
卧聽蟲恤緯不能  
成我衣爾蟲焉足貴

題余葭白青燈雪屋圖

賤子客廣陵塵土感騷屑白帝初執矩赤牒未弭節何  
方解炎歊噓以庾郎雪移我墮寒林短紙開凹凸銷餘  
復待伴入夜氣嚴潔瑀然落風枝夢醒覺衾鐵燈光與  
雪光爭此破窗穴直身凜自持孤吟慘不輟琴絃為一  
心雖凍詎肯折起視江外山玉立正清絕寤言期斯人  
歲晚袪內熱

公路浦即目

傲傲水柳細成行荷葉無花亦自香行過江淮惡風浪

幽情忽到小池塘

桃源縣雨泊寄舍弟子山

帶雨河聲大維舟暮色虛蟲喧堤外草燭映枕邊書瘦  
弟入魂夢衰親問起居天明仍捩柁遠道信來疎

嶧縣道中

蒼翠連鳬嶧秋原望更深僕夫通馬語行客抱山心沙  
雨纔霑路涼蟾忽到襟豆花門巷小何處似家林

宿鄒縣謁孟子廟畢看嶧山夜月

廟貌樞衣拜機絲儼若新月來邾子國人宿孟家隣翠  
嶧森侵漢殘碑遠失秦松風吹夜氣壁立四無塵  
廟有斷機

堂

富莊驛遇潦

野水秋無次能為塗轍妨棗林明四望黍壠白中央馬  
足行雲影車輪陷鏡光空村烟火絕竟日苦飢腸

任邱道中寄汪祓江

雨挾雲陰天四垂孤城紫策況淒其綠楊風起狐狸涎

細草烟荒扁鵲祠  
劍客於今誰忼慨  
馬羣自昔重權奇  
燕南趙北明朝是  
秋水茫茫有所思

趙北口

齧盡長隄碧玉平  
喚船人集午相爭  
偶然求馬懸車渡  
亦似浮家汎宅行  
魚柵低圍蘆作界  
酒帘斜挂柳為城  
眼前便減風埃色  
何用臨流更濯纓

都下寓舍偶作

即次便幽窄窗深雪  
紙明棘牆愁露索  
塵市畏風行自



攝安眠食無求少送迎瓦鉶鈿菊小伴我一枝清

入洛誰相問深居等繫匏唐碑從寺勘秦譚偕僧抄風

雨新圓夢雲山廣絕交時時期二妙攜手看烟郊

謂金繪

符幼魯

風氏園古松相傳金源時物近為人所伐幼魯有

詩惜之邀余同作

昔游長安歲辛丑城南欲謁支離叟雪雲連日成春陰  
人事逡巡願終負鵠袍烏帽感秋氣首問支離無恙否

故人三歎為我言長身摧折名不朽偃蓋爭看前輩句  
清陰屢入游人酒不隨風雨飛夜半蒼鱗剝落根如白  
我聞名與身孰親此理天壤誰為剖藤纏鼓壑雲霧障  
長得千年養靈壽輪蹄人海叟何心占此區區地盈畝  
豈無匠石議斧斤竟使樵蘇疑怪醜榆承露盤不自畏  
楮錄醫經最顏厚但讀南華齊物篇世間變化無不有

寄內

炎風記上郭門船回首高城更黯然徐淑初還因善病

龐公欲隱坐無田夢回竹月攤書地人道風潮損稼天  
行卷賃居成左計心關桂玉路三千

南歸夜行趙北口同范希聲作

歸人千里指故鄉三更霜霧霑衣裳有如小兒卧車箱  
搖則成夢醒已忘寒星在水森有芒仰視畢昴紛低昂  
遠烟蒙密隄影長西風策策吹枯楊參差人語知異方  
作事五角與六張我識此趣如瀟湘菰蒲明滅燈火光  
驚起棲雁飛一行胡不飛去江湖旁

九月晦日曉行阜城道中大風雨午間飛雪宿漫

河作

野曠雲亂生天黑月正死登車偃破帽寒門開萬里風  
從何方來洶洶鳴不已大聲東海濤小聲空林鬼浩蕩  
達士曾自詫無此耳中間零雨集覓路復迷咫尺車候  
天曙兀兀行泥水天公善娛客吹作玉花委飢雀喧茅  
檐勸我可以止溼薪燎故衣冰蠶銕老齒江南孟冬天  
妍暖梅弄藥誰遣北地游北地寒至此

東阿逆旅壁有無名氏絕句云霜樹微茫月半環  
解鞍茅店且偷閒行人過盡嚴更發一盞寒燈滿

屋山次韻一首

斷岫層巒似玦環客亭挂策夕陽閒重來柳髮疎於我  
滿眼寒雲話故山

過東平懷蘇源明五太守讌集之詩城外山際積  
水空明疑是小洞庭也即效其體

夕稅駕兮宿東阿思東注兮若流波朝秣馬兮望東平

霜空島兮初日生澹平林兮遠如一寒漲落兮洲渚出  
巡中湖兮眇而南山僬僬兮形眠蠶輕橈去兮思夫君  
大藩理兮譙以文嗟繭絲兮人或擾懷風流兮散雲鳥  
命元氣兮為余舟野荒忽兮期同游

元氣為舟  
仲長統語

### 徐州舟行紀事

檣為舟中權帆勢若懸纛有時牽挽勞竹索相綴屬我  
舟順流下彼舟適遭束絙急不可弛磨戛鳴數數兩舟  
掣而離其勢不轉矚篙師失聲呼疾似捩空鵠高檣忽

中折觀者膚盡粟我舟播蕩餘幸免鬼伯促性命亦匪  
輕造化戲何酷有如爭拔河一跌聊自贖又如放風鳶  
線斷偶然續神意憐迂踈字飽飯不足書寄破冢出事  
過虛船觸是時冬上旬冷月光於燭漕河下牕牢函水  
嚴監督三暮復三朝何時峽離蜀帽脰望南雲臨深古  
所勗

葺屋

倦游今亦厭飛揚始葺城隅破草堂檢校幽詩小經濟

蹉跎寒事舊林塘  
晴天免縮參軍首  
雨夜休移杜老牀  
更乞山僧安隱法  
淨名圖畔自燒香

開湖寄徐丈紫山義興

君昔閉門湖上初  
葑雲萬丈復開蔬  
誰其云者兩黃鵠  
我欲遺之雙鯉魚  
明鏡拭平西子面  
翠綃展盡水仙裾  
待回罨畫溪邊櫂  
酒舫隨風縱所如

雪後同耕民汎舟北郭游一僧舍頗盡幽趣

臘尾能為寂寞游  
恰經野渡有漁舟  
過橋溪水斜風急



帶雪僧房落日幽  
世外話銷商陸火  
林中春在木繇裘

平臯鶴叟今何處  
吟望寒山空點頭

元張仲舉在杭日  
有一私印文曰平

臯鶴叟蓋取北郭三山名臨平  
臯亭黃鶴也見朱珪名蹟錄

春雪密香齋擁爐同少穆耕民作

春寒春雪劇相仍  
小坐林巒白幾層  
冷淡交情宜歲晚  
清嚴況味在晨興  
同依品字柴頭火  
老作梅花樹下僧  
門巷泥深君莫去  
紙窗猶有照書燈

樊榭山房集卷三

欽定四庫全書

樊榭山房集卷四

錢塘厲鶚撰

詩丁

人日同陳授衣丁敬身石貞石登吳山用石壁上

東坡先生釋迦院看牡丹韻

以下  
乙巳

紅妝小隊行春時江山著色供吾詩坡公健句入苔石  
花殘石泐公應知登高今日情難已不約還成七人矣

嬉游大好同隊魚何必飛騰千萬里

西湖感舊和貞石

少年落鬼惜春寒花外層樓燭影殘一片湖光渾似舊  
雨聲不到曲闌干

原作

石文

碧桃猶繞舊池臺吹徧東風尚未開游客重來人不  
見簾前細草短於苔

和余葭白題唐子畏畫韓熙載夜宴圖

韓郎自是江北人避地去作江南臣更從江南到江北  
便道江南有人憶歸來笑擁名花叢疎眉小面居當中  
千枝銀燭照舞影滿堂賓客看驚鴻門生解事執樂句  
燕支拍碎聲穿空酣嬉跌宕君莫笑一半桃李無春風  
宮中唱念家山破燒槽哀怨傳何窮聊將羣婢汗名檢  
此意未必聞重瞳六如居士不並時何由戶外三更窺  
筆底故有媿與施我不見畫但見詩詩工直疑畫遜之  
眼飽鉛黛嘲貧兒從來裴休說法為人願不妨衲衣乞

食隨歌姬

揚州清明有感

游絲墮地花斑斑客如顛當長閉關芹芽入市刀鯊上  
非我無酒開心顏翻書偶記柳州柳千言寄友經憂患  
平捧奠子立拜掃阻舉首北望啼痕潛迴腸振觸事雖

異阿父淺土情尤艱敢求范氏上吉冢

事見真誥

但得雍伯

無終山不官免學右軍誓有約直待龐公還西山地燥  
一抔足雲衣水樂相迴環其旁種竹置丙舍賤天乞得

清且閒年供麥飯作寒食祀罷松鳥鳴喧喧嗚呼此願  
果何日新烟旅食茱萸灣

夏五閒居八首

始春遊廣陵仲夏返敝廬出如謀食鳥歸似止灤魚江  
湖已相忘三歎無定居開窗延衆綠檢我牀頭書

冥冥雨響池戎葵卧無次南史展一編蕭條有餘思治  
中好貴因正以簪紱累鳴蛙亦復佳何必當鼓吹

書生賦分薄一飽走他郡淮南米貴賤曾致杜老問沉

舟及吾鄉是役恤民隱隣商或不前曷以周遠近

錢唐古城東幽澹水木趣故人能勗予寓寄灌園賦

正

間潘時雍隱居杭城東自號灌園生見清江瑗  
為作灌園賦陳楞山在真州曾書一通見貽

時疏利

於驚荷鉏跡尤慕西山隅城青白氣半為雨

借書出北郭籃輿白蓮風俯仰蓬藿下詩細復史通鼓

琴賞山雨不送雙飛鴻沖晦去我遠皓首見此翁

吳文志上

小山好兄弟伴來問消息正值卸擔初相見吐胃臆冷

泉觀雨詩崩崖與筆力想見坐聞鐘竹雲暗燈色

趙功千意



林

沈身鶴立居心乃淳靜去作長沙游幸不卑溼病風  
健湖口帆霞送滕閣興料君垂橐歸世故已先定

沈樂城

今日理生衣快風收鬱蒸飛蟲強多喙逐去棲荒塍茗  
和月露煮盤剥青腰菱試效采菱歌鄉味得未曾

梁溪舟中苦熱寄汪青渠

頻年奔走厭川陸六月浮舟信更難蘋末不傳涼吹起  
峯尖空逼火雲看只愁嘲客徐常侍詎肯因人梁伯鸞

記得松陰對揮麈掬泉龍吻酌清寒

荅蔣丈靜山蠡墅見寄

相望經年闕報書江關復此感離居我貧為客交親絕  
君老辭家齒髮踈蹤跡前身三事衲英雄晚計百金魚  
萍流匏繫俱難遣濁酒何時過敝廬

題馬佩兮所藏馬麟摹黃筌春波瀾鷺圖

江南別岸風蘭密宛頸文禽水中出回眸不異錦城春  
內家最賞臣麟筆沈浮一對常相見漢宮應有額房燕

可憐未得辟寒金  
夜夜羈雌怨秋扇

楚中有刻近人詩者  
謬收鄙作其間姓旁誤增力  
字戲成俳體寄吳尺牘

展卷風前睡眼醒  
何人未辨六書形  
蕭生有系知非鄮  
溫尉如存笑帶令  
旅食欲添雙鬢白  
鄉書只說兩峯青  
多年不得詩書力  
早晚烟波買釣舲

秋雨雜述四首

吳江澹秋水雲氣垂  
太湖我時趁風雨  
身作歸舟圖風

橫雨亦斜帆，鼓不可扶船。  
艤帖波走獵，獵吹青蘆。  
撫枕那得睡，快意翻驚呼。  
舟人小搖手，笑客一何愚。  
明朝中元近，武林酒堪沽。

憶昔游永康，亂山趨小邑。  
竹輿兩日行，行行雨如織。  
千松萬松中，聲與飛泉集。  
紙傘但蓋頭，肩胛已盡溼。  
野廟聊暫休，青草無壁立。  
荒涼此何神，香火久不及。  
豈能司陰晴，土偶亦垂泣。  
秋氣衣裳單，雨勢暮尤急。  
宿處隔山腰，穿雲更深入。

欺客雨灑燈驕風馬騰阜長安望迢遙  
舊縣苦流潦同行功名人甘寢固自好  
而我悲秋徒百念集如擣候窗聽雞鳴  
結束出門早陰雲暗車蓋深泥沒車道  
大野回清商淒紅染林棗積水解照顏  
一夜頓成老

農飢望時雨雨足願無違士飢在遠行  
遠行不救飢今年淮南秋有夢先書歸  
覺來聽急雷枕簟涼霏霏舊事忽上心  
充斥何由揮挑燈歌此曲愁絕聽者稀

八月四日晚雨極涼

急雨淮上來沈沈暗樓堞須臾風引去秋星照涼葉孤  
客坐悄然愁思紛重疊誰與話流光熟衣先在篋

授衣續婚廣陵戲贈長句

陳郎三載蕪城住不復寒衾夢秋雨人生會合何可量  
壻鄉山色空濛處美如孺子豈長貧才是丁儀當與女  
却扇寧無故劒思寫韻依然玉臺侶吾鄉昔者吳安中

宗錢唐吳師禮廣陵王逢  
原之壻子傳朋俱工書

陳郎盛禮將無同只愁埽眉

筆矜慎求書不冑面發紅扁舟共載須怱怱吳山晴翠

開簾櫳生兒未學游絲帖一笑堂前慰乃翁

九日雨中集葭白齋

年年秋禊在天涯  
伏雨闌風亦復佳  
夢語蟬連同短榻  
鄉心鶴望繞閒堦  
醉依菊塢敲斜坐  
靜檢書籤次第排  
不是故人齊臭味  
登高無地可開懷

吳中有書賈來廣陵出古錢三百餘見示刀布正  
偽諸品皆備汪君祓江拓其文凡四以遺予一曰  
千秋萬歲面有龍鳳形一曰長生保命面有北斗

及男女對立狀一曰斬妖伏邪面有立神一蹲虎  
一符篆一一曰龜鶴齊壽面無文蓋古厭勝錢也  
暇日裝潢成冊為詩題後并邀被江同作

翠墨手拓圓輪文空齋寶氣歆浮雲我有蕭愚子和癖  
嗜好與世殊猶薰雪繭留跡聊飲眼造自何代誰云云

千秋萬歲僅著錄景嚴好事資前聞

千秋萬歲錢見洪遵泉志

其三

吉語擅蒼雅自藉神力通殷勤下土蟻臣但稽首長生

大帝保命君子餅解崇光景絕

宋周希稷詩誰家解崇吐于餅

縞衣青



純年平分反觀陽幕得奇質

儲華谷云錢以有字處為陰無字處為陽龍鳳

騰霄虎輪乙斗匡首戴聲迴環掄袂交帟永為匹世間  
兒女例心忪雨冷重屏夢蕭瑟乞將後魏五男錢速勝  
淮南萬畢術撒之未足慰寒人佩此端能已愁疾壯夫  
也復愛虛名叩齒清思坐幽室裝成一日百回看探囊  
尚有雕蟲筆

汪為山亦贈予厭勝錢拓本文曰金玉滿堂篆書  
面有雙龍繞之上有柄作片雲形大徑二寸續裝

於冊更為賦詩

金玉滿堂語見之老氏書所貴在能守盈縮相乘除胃  
脯或連騎舐痔乃得車彘緣走權要極意為佃漁轉瞬  
領軍屋鎖澀集夔魑得失鄭人夢此足發軒渠錢環篆  
四字字偃披薤如善祝無寓規陳義難齟齬片雲抱廓  
外山氣鬱不舒日冠月有珥陰豷紛騰挐水衡駭未睹  
詩客何由儲紙勞脫輕影一再結相於故人意不淺緬  
想叛物初不貪永為寶無悔亦無譽

蕪城小春

十月江天未隕霜  
阿師橋畔善和坊  
早梅門巷如人白  
殘柳旗亭勝酒黃  
公案此時參閉目  
風光何地不迴腸  
莫言新雁無才思  
小草傷春句一行

十月十八日同余葭白陳授衣閔廉風游禪智寺  
適聞古寺名荒遠  
默有會牽率聯臂游  
新勇劇動旂平疇  
棲餘糧踈籬擇寒菜  
年登緩鄉思樂事且  
人外坡陀掉尾岡  
氣壓全楚大  
因知岷峨靈小住  
踞其最枳闢羅

高松落落十數輩塵耳迷聽瑩為我發空籟遠烟老淥  
城低帆召伯埭指點虛無中晴出山影碎隋宮宿佛軀  
清淨掩侈汰土木非昔時晝燈黃葉內亦列千便娟風  
竹見舞態井谷窺深泉匱鏡寒不晦了知起滅想無用  
勞感槩何來寶誌公跣足入殘繪吳裝僅形模石剝損  
風帶壁陷眉山書傳刻但茫昧新苗老葉句未受詩案  
効寺有石刻吳道子誌公像東坡和蘇跡疑歲月駛劫  
伯固游蜀岡送李孝博使嶺表詩

換名字在鬪螳俛人羣放眼寄大塊胡為雲萍身物役

自拘閔暫託賢友生林垌得佳賚彼哉稗沙門慢幢乏  
應對此邦重賈雄餘習被香界一笑下顏陽叢雁破霜  
靄

冬日移寓葭白齋中二首

城邊烏尾排檣竿楚天盡處吳天寬南商北使津鼓競  
歲晚誰道川塗寒客牀高坐自偃塞束書不觀目空睥  
篋篋尚阻西上魚體中何如強眠飯

間門清寂如野亭四壁鉛槧棲餘馨諸餘盆盎殊碌碌

古壘洗蝕銅花青銷寒絕唱誰能和斗柄闌干雁聲墮

對牀無雨也可憐君能館我支頤卧

葭白近作銷寒雜咏數十首

畫松歌送沈丈樗崖歸宣城

明徵君眉生先生之孫

耕巖先生冠社籍儒衣欵受思陵辟飛章首論武陵楊

閉口曹蜍動顏色昭亭仙去無消息今代名孫古遺直

輪囷壯氣無所施老腕生松萬鈞力蒼龍鬱律蟠胃臆

昨夜山南夢吞得天寒張鬣不作雨驅向剡藤但僵立

仰聽傾崖清響入俯窺凍壑圓陰逼坐我石梁布水側

豈識松身元是墨北風客舍逢君揖白髮滿頭面黧黑  
欲持勁質贈時人金錯刀囊慳反澀槎枒忽壓俗眼驚  
醜怪能怖嬌嬰泣愛君幅幅有題句何異前朝述祖德  
襟衿篋畫乘歸航與松偃卧江路長到日柴門宛溪上  
舊種手掇絲苓香君其行矣慎雪霜

雨中過錫山

寒塘淼淼風聒聒凍耳惟聞榜牀撥九龍頭角半入雲  
只有東峯塔穎脫隔岸人家倚衰柳帶溼炊烟青一抹

帆遲目短望遙遙頗羨安居對疎豁秦餘杭山次第迎  
為乞紅萍照裘褐

歸來

歸來抖擻布衣塵竹几藜牀意最真坐愛陽光通一室  
卧聞冰雷落比隣淮南書內題春女揚子經中說夜人  
我有心情狎寒晝九遠不著自由身

正月八日城南紀游二首

以下  
丙午

梵天寺



廢寺不鳴磬林鳥散夕陽山曾識坡老塔尚記錢王初  
地藤纏瓦三門竹補牆人間重陳迹留坐看江光

崇聖院

春早禪扉靜長廊得恣行小詩同勝事前輩復高情松  
密窗窗碧泉多步步清吾師謝無逸埽地過平生

壁間石刻

米仲詔聞子將姚有僕李長蘅嚴無敕諸公詩勝事如要言煩多損精微無敕句也

十二日同聖幾汎西溪暮宿姚氏莊

溪風吹小艇竹色過橋昏幽子賞此意欲與山鳥言鳥

飛向烟暝緣流到柴門丁男解迎客中婦羅酒尊莫笑  
濁酒酸古道賴以存燭至月上散步長松根空山靄  
微白春夜雲遂繁是知歲事初物候漸可論余生困棲  
泊稍得依田園溪源接天目一夜清心魂

新市道中

擘岸風多損晝眠荻茅短短不生烟水村無避春寒處  
來覓酒家門繫船

曉發烏戍大風過平望

落月瞰低蓬，睡思紛以積。  
隔樹雞亂號，已辭休文宅。  
披衣起盥饋，到眼盡前迹。  
誰令數往還，自詭非物役。  
正賴吳壤佳，關心太湖白。  
水黯雲兼風，聊闊不為窄。  
輒浪大於鷺，艤子坐受拍。  
銀魚漸上市，榼酒香可坼。  
春初人行少，芳意佇遙客。  
夢尋銅井梅，簪花去腰笛。

泊垂虹橋謁三高祠疊前韻寄陳楞山

吳淞洵可居，烟水古所積。  
王郎睢菴詩，佳處宜買宅。  
橋上玉蟠螭，漁樵見行跡。  
篙師頗解事，萬景入驅役。  
落手

釣雪灘鳧陣際波白蒼茫遠帆歸天影與寬窄興豪驚

吳兒闌干有時拍荒祠最庠隘苔甃碣已圯

范石湖三高祠記碑

僅存半截陷於牆下殊可惜也

移置諒匪艱諗此後來客酌水酹三高

雨卧夜船笛

太鴻放舟垂虹橋謁三高祠有詩見寄依韻奉答

鄞縣

陳

撰 楞山

細雨聞歸鴻相思夜來積忽傳連紙詩佳興如汎宅

吳淞我熟游此段失蹤跡要須期新涼偕子更于役

扁舟凌萬頃攬盡玉華白縱心觸遙遇盈目開偏窄  
深杯計較足相與共浮拍長吟激水面寸寸秋翦坼  
便可呼三高奚暇問主客此樂五百年黃樓風月笛

雙橋

不復緣故道遲遲望水關雙橋舟楫減十里浦雲間陸  
子逃名早梁生避地艱漁郎無所恨日夕和歌還

二月一日丹陽舟中初晴

故國陰彌月江程晴一朝流年供浪跡極目咏離騷陂

暖初青麥沙明上信潮熟知春事近更覺旅情遙

憶筍

三月春風老鄉園未得書平安問修竹甘脆憶家蔬雨  
綠盈山市泥香送佛廬清饒有如此血味願放除

餅中桃花

不擬花遮眼欲知春未闌映窗憐曉色注水養餘寒悵  
望無言甚殷勤命笑難皋亭紅萬樹讓與別人看

四月吳淞好二首

四月吳淞好天低樹壓橋青蘆界湖尾白鳥點山腰踏  
水女初嫁搦魚童尚髻令人慙寄食客思轉蕭蕭

四月吳淞好商船發更稀城陰水楊柳港馥野薔薇村  
熟知嘗酒涼多不減衣垂虹亭上望隊隊晚漁歸

五月二日生日有感

又是江南梅雨天此生逾壯思悠然矜張久厭宣明面

草澤誰知正禮年

上句宋謝晦下句梁顧協俱三十五歲事

情類疲牛踏陳

跡身如社燕寄修椽

兩年薄游揚州

佳時畢竟推吾土樹外雲

峯對榻眠

題陳惟允采菱圖

水村並青山叢灌無重數  
曲渚藏幽軒片雲過飛雨  
彼美學操舟搖浴出前浦  
相期采芳伴弱腕擎翠縷  
長歌淶水調知音心獨苦  
垂綸者誰子習靜看沈羽  
高士諒貞心明妝若無睹  
日落渡頭波風吹湖上樹

次韻

仁和趙信  
意林

采菱復采菱菱香不知數  
綠葉出波平刺船響於雨



佳人重芳鮮三五沿南浦  
清歌唱滿湖餘音嫋如縷  
蕩槳山之陰竟日忘炎苦  
照影惜朱顏驚飛雙翠羽  
此中把釣翁時聞更親睹  
愛住水鄉寬晚峯窺倒樹  
坐聖幾秋聲館作

吳水抽帆乍到來梧桐高館共遲回  
屋頭大葉自吟雨衣上綠陰如染苔  
五柳先生雖寂寞雙楠居士不塵埃  
明朝知有書船至珍重荆扉手為開

午日湖上同少穆耕民觀競渡

鄉園五日何所為相與牽挽趨湖湄湖波帖妥平似席  
波上忽有羣龍嬉龍頭昂昂尾攄攄伐鼓撾金聞近遠  
青山幾點彩幟飛萬人拍手回橈健吳兒踏浪雨足霜  
鏡心越女開紅妝大船小船更旁午此豈有意哀沈湘  
誰家放鴨爭歡謔不用金丸羽毛落分曹齊赴鸛鵲軍  
凌波競捉鰩鰕躍須臾細雨東南來水仙鳴佩琉璃堆  
天公不令興易盡菰蒲斜日明深杯人生即事有今古  
回首平烟空極浦金明池上奪標圖當年盛事亦已無

獨醒不醉胡為乎

聖幾餉龍井新茗一器

松風出竹爐夢成水火戰新芽適開封昏睡不待遣為  
子手淪嘗三嗅復三嚙中有參寥禪風味得正見

吳丈志上七十生日即次其病起韻為壽

巨手詞場老斲輪天留黃髮在衡門情深深濠濮常觀物  
學邃河汾更有孫應築閒坊題大隱漫論朝士記貞元  
謂宋牧仲太宰長年不用枚乘發宴坐三田默自溫

五月十八夜偷兒涉水入室家具頓空戲成集杜  
喧卑方避俗有跡負前賢幸喜囊中淨翻令室倒懸莫  
須驚白鷺遙憶舊青氈反樸時難遇何如穩晝眠

秋半苦雨

秋宇何時爽江雲不肯輕蛤潮傷楚稻魚淦賤吳羹客  
夢偏多緒農愁非一聲曾無補天漏滿眼急流橫

烘蟲和葭白

微蟲爾何知善鬻稱其職回臭性所甘跖香獨不即求

伯夷種粟向仁祖索食試詰玉溪生此理定無惑棄瘠  
而涵腴是為蟲之賊故人聳山肩寒几燈影側語我怒  
蟲輩往往見於色但叢敗絮繒那緣好要襪餐如供帳  
行暴或夢枕逼口中妨吟情爪底費書力永驅羞空囊  
草辟謝多識安能學獼猴擇之終日晨早起筮得離當  
付女丁殛燎原固足快殲類似猶惻龍性稱難馴鶴儀  
頗孤特蟲於二者間殊形尚潛匿用以成君高有怨始  
見德為君回束縉一點星影艷上爛田中螟下照水中

蛾

原作

江都  
余元甲 跋白

百蟄潛冬房爾獨襲寒育網緼忽迸逸肘腋失蒸郁  
么麼難搪撐猥瑣任挫胸隱蓄噍血心細挾中人鏃  
商子二十九有言頗笑僂五蠹作強援三官婪弱肉  
汎濫狂不制日已削其樸而尚恣林據不恥賤碌碌  
貧者即噉嚼富者便踏跣就顏轉跣避絕香翻臭逐  
遂令志士懷莫不奪翦撲我貧在筭空身情少湔浴

致爾固有因何至日相感聚白塞禪縫變黑升帽屋  
亦思出手捕爾衆我乃獨惟藉司烜成一炬赤其族  
顱焦細黠殞臍然老姦縮驟枯是烈禍宿饕詎淨福  
衆穢蕩為燼瞥眼頓清肅始知策火攻絕勝具湯沐  
姑息即滋蔓焚如豈虐酷斥惟士蔚賦破學柯古錄  
更作烘蟲詠為彼職齧告

十二月六日大雪初霽同耕民著屐登吳山歸檢  
鄉先輩凌柘軒集有同瞿存齋吳山對雪詩因次

其韻

天翁戲作冷飛白一夜錢唐風浪拍曉來巫上吳山巔  
橫倚玉闌三百尺好奇走喚南隣翁失却江上諸青峯  
片雲不到塵不到素華倒射扶桑紅此時酒盡興未盡  
孤嶼重湖迷速近垂竿想像茜衣人欲覓良工戴文進  
曲磴背接烏龍潭翳松埋石窺茅菴樓臺一色圍縞帶  
耳靜已隔交衢談巖冰重結陽光暮楓嶺嵯峨凜難度  
玲玕屐齒折高寒驚起飢禽屢回顧歲華炊黍來堂堂




須琢好句題幽篁古今清賞遞相屬十指肯學懸槌僵  
山中老仙觀衆妙遺蛻如蟬恥常調洞門不夜鶴無眠  
看雪入歸定騰笑

被江在越州以竹火籠二枚見寄

織筠瑩節光於玉圍就家江水盈幅此君面目含清風  
解與人間作暘谷中函紅泥爐子小如餅可挈藤蹇求  
烏篷一宿固陵關伴書遣送長須僕上言稽山大好雪  
雷挂玉龍風折木裁詩坐念窮東野致此令成手翻覆

一笑感君故意長如玉有雙衣有複欵火微溫生裊底  
澣紈知無功可錄薑芽不斂蹲鴟舒惡札縱橫顏有惡  
奉之高堂遺細君堪助中廚調茗粥寒宵不怯金十奴  
更為游子宜春服



樊榭山房集卷四

欽定四庫全書

集部

樊榭山房集卷六

詳校官侍郎臣謝墉

助教臣常循覆勘

總校官庶吉士臣朱 珪

校對官中書臣程 琰

謄錄進士臣沙重翰

謄錄監生臣蕭日昕

欽定四庫全書

樊榭山房集卷五

錢塘厲鶚撰

詩戊

正月晦日同姚玉裁念慈游道場山

以下  
丁未

蒼山多有名彩翠盡延眺道場獨爭長孤塔屹自表出  
城盪扁舟擢聲破烟曉路折循麓登湖色浮木杪是時  
春不喧羣岫寒悄悄苔響入空堂接武出叢篠山僧導

客至清炯窺碧沼焚香誦坡詩作禮共圍繞二君天機  
深取映心鏡皎巖際送飛雲樓陰望歸鳥塵緣一以忘  
淨義庶能了

歸雲菴拜孫太初墓

山風穿竹徑仍署挂瓢堂生不販雲壑夢猶依佛香雨  
昏苔石字僧護鶴田糧悵望空歸去明朝問釣航

菴有挂瓢

堂額鄭少谷書  
太初舊物也

西湖春雨四首

冥冥苦霧溼堤沙店舍無人酒幟斜已是祠山生日過

小梅猶滯雨中花

杭俗以二月八日為祠山張真君生日必有風雨

價低易上郭門船衝破西林一抹烟游屐不來三竺寺  
乞晴勞動白衣仙

無賴東風轉柳條雨從月額到花朝少年記得嬉春事  
斜日衣香第四橋

遙峯隱見黛眉攢怪底春來無此寒朋比熏爐風味淺  
有人樓上泥闌干

二月二十九日同耕民閒步東郊晚眺沙河二首  
雨多常禁足及此出郊看風力暄猶勁天容霽始寬波  
神青櫟廟田祖白茅壇詎學懷甄俗班春話好官

村舍留人眼魚梁枕水低林長共澄暎雲細得端倪山  
影鳴榔遠蘆根下梅齊閒心分物色坐待日平西

三月一日同杭大宗符聖幾汪西顥游皋園園在  
城東為巖顥亭少司農所築得詩二首

侍郎遺別業幽絕擅城隅風雅今何有荒涼感不無莎

亭通客僦花徑割隣租只共閒人到尋詩白日晡

似得春愁遣因延野色來垂楊埽慢水叢棘出殘梅學  
圍容身隱題名恐俗猜休將雍門淚霑灑舊高臺

是日春社晚歸坐雨寄諸君

霏霏社公雨一片叫蒼鳩勸影燈前酒搖情江上舟  
句無劉夜坐興比薛春游爛漫期仍踐更闌簷滴休

清明後一日同大宗敬身西顥聖幾游城東顧氏

莊



節去有餘興行吟不自料汀花烟色舊墓草酒痕消蠶  
理今時始茶香見客邀回頭迷萬綠何處認溪橋

暮春馬佩兮來游湖上用去年泊垂虹橋謁三高

祠韻

多君濟勝情重疊如襞積昨來勇渡江穩汎春水宅

楊廉

夫舟名見東維子集

誰為釋幽憂達生寄浪跡笑謝夸舐子汲汲

事行役相逢古城西花下眉最白平湖葑初卷放眼開  
塞窄魚檻叩堂堂鳧浪飛拍拍此間著君語彌使氛縊

圻裏回僧樓上為遲白蘋客

時板江在吳興未至

相與尋清音

耳屏箏笛

和佩兮游冷泉寺

春物已芳柔  
西山果始游  
泉喧石頭雨  
亭壓樹身秋  
魚板諸天午  
香燈古洞幽  
吟成誰與賞  
猿鶴此淹留

原作

祁門馬曰璐佩兮

鐘音一星星  
幽尋獨此亭  
山從入寺好  
泉欲過時聽  
冷氣怯春服  
清暉隱翠屏  
我來巖下坐  
刻石記曾經

獨游滄浪亭五首

桃萼飄紅上菜臺，蕩湖艇子轉城隈。  
春陰不憚盤閭遠，為謁湖州長史來。

略約難通步屨緣，三騶意氣擁林泉。  
人生是事俱闕分

他日重游亦偶然

是日有達官寓此，不得入，隔水遙望而已。

彷彿南園築北碕，鴨毛小漲碧參差。  
行人羞照風塵鬢，手弄垂楊立少時。

世波宦轍等羈銜，水竹因依最不凡。  
祠屋如聞神爽在

未應蕉萃舊欄衫

回首疎籬帶綠莎歸來猶唱濯纓歌城南一路供怡悵  
老水平田古意多

同被江佩兮游支硎山

歎息買山無此君松聲猶遣世間聞  
筇杖撥開泉架分正始風流餘馬跡  
琅邪人物散烏羣  
吳娃嬌小何知許賸把春妝點白雲

寒山尋趙凡夫隱處有法螺菴千尺雪諸勝

寒山寒氣貯春餘入谷風烟更翳如崖接扶闌疑蜀棧  
樹懸飛雨想匡廬縑流尚記人偕隱青竹今無客著書  
勝絕未能千日住楓橋漁火暗村墟

夏至日雨中得金壽門澤州書

昨夜雷驅雨柴門碧漲平送梅簾額潤改水井眉清懷  
友無高翮函書自遠程憐君太行險難減獨詩情

夏至  
浚井

改水見  
後漢書

雨中江上六言四首

樹外雨隨風至塘邊水入田流帆低廟子沙口人語龍  
山渡頭

橘蠹化雙飛蝶桑芽飼再熟蠶隔岸雲屯黑白近城岫  
洗青藍

村娃向井提瓮田父衝烟曳柴老我三家竹墅宜人一  
網梭襪

梅候不便北客波官多賽南朝江平觀漲小艇雨歇迎  
神洞簫

寄題姚玉裁蓮花莊圖

苔溪之水不可唾蘋洲之風正堪卧月河西面蓮花莊  
憶我春寒搖艇過炎蒸那得對絕境世事參差每成左  
故人住此寫成圖為詩卷尾邀朋和解維碧浪恐寒盟  
滌筆冰甌方夏課流聞昔是松雪居畫髓琴心已傳播  
山澤何妨子固譏風雅猶忻道昇佐翰林承旨七司戶  
插脚紅塵應謫墮池亭蕪廢蒼烟空沙觜鷓鴣為偵邏  
悠悠今古等傳舍宋宅謝墩寧受浣清才異代遙相望

舉杯酌與林塘賀  
遙山隔城天鏡倒  
白雨環橋水荇破  
染書濃綠浮四面  
收釣涼螢飛一箇  
秋風鼓櫂擬再來  
鯖鮓斫成蓮葉裏

六月十日同丁敬身石貞石游龍興寺觀唐開成

二年陀羅尼石幢為處士胡季良書

寺為梁發心  
院唐改龍興

宋改祥符在杭州城西舊基廣袤九里後漸沒入  
民舍石幢在夾牆空壘中明季忽放異光居人捨  
宅重建去今祥  
符寺里許矣

涼颼洗河橋斜景筍屨踏青丘垂牆匡古寺門半闔千



年十寶地

王鞏隨手雜錄錢王有外國頗眩伽寶方尺餘狀如水晶置龍興寺佛髻中皇朝改為太

平祥符寺自唐至皇朝凡有十寶此其一也

湫隘屋廬雜九曲何處尋

東坡有祥

符九曲觀燈詩

廢塹產鳴蛤石幢妙章草下有舍利納立神捧

蓮趺光氣夜欽欽遂令婦子棲儼化梅檀塔吾儕好奇

癖往往臭味合丁君尤勇銳辯證紛馭選乍睹增雙明

久讀繞三帊濡紙脫其文可供硬黃搦問年值唐季逾

歷幾腰臘城中易黑灰此獨未摧拉瑩無蒼蘚生古色

對磨衲許醉聲聞酒乘月再提榼

聖幾送漳蘭二枝二首

垣侵薜荔徑蓬蒿零落幽叢夢想勞忽見微波小翹楚

勝歌二十五離騷

孔行素至正直記明雪窗畫蘭法有大翹楚小翹楚諸形

全枝明玉最清妍香氣常隨過嶺船只合詩人熏几席

翠壺回施小乘禪

月夜渡江

露荻風林隱戍樓宵分月上動行舟凌雲髻髯三山意  
濯足空明萬里流北府兵厨誰與載南朝詞客肯同游

人間奇絕成孤賞喚起魚龍一笛秋

北府兵厨宋時鎮江酒名

葭白病瘧初起招飲月下作

金柔火老爭混茫中人腠理搜膏肪水帝之子何披猖  
芙蓉旗弄明月光乘時復出煩厭襍竊據四體為強梁  
將軍亦病顫帝旁呼桓石虔勇可當橫楣齧缺懸蟹匡  
閣下力士逃且僵隔日杜陵覩鮮妝曷不拾句誦子璋  
乖厓夜談撼隣牆潞公花押筆勢剛夢回便娟授蔗漿  
博士冢土低枕囊子有道氣通中黃小苦不肯僵在牀

室無傾視骨節強血味久絕藿食常如蟻決孔堅隄防  
辟邪亦有魏迄唐汝不去者後為糧纖雲四卷月照廊  
酒氣拂拂十指香我飲不盡醒而狂仰吸沆瀣斗低昂  
為子七發歌此章矯如鷺濤翩下翔

揚州客舍夜雨

十日秋來九風雨田家客子同煎煩莎雞溼語此時壁  
水鶴夜啼何處村石曼卿已卜親窔許元度將為弟婚  
依依顧影在千里想得家人燈下論

趙飲谷買得樂安長公主小玉印出以相示予定  
其為明光宗女熹宗時所稱皇八妹者因賦長歌

揚州塵土日紛紛玉氣市中為白雲前朝貴主風流遠  
認得藍田小篆文瑤華裁向瑤陞底母性便娟本穠李

淚灑龍髯一月餘移宮倉卒驚羅綺忠臣豈肯為身圖

帝姬入井知羣誣亟封康妃託遺訓誰令國柄歸閹奴

雲鬟扒角年猶小

劉若愚酌中志皇女十餘齡留親見  
髮打扒角至選婚始擇吉上頭親見

乾清尊趙嬈須臾委鬼共銷亡信王握璽瞻天表初下

銀河織女機盈盈十五已勝衣粉侯纔習膠宮禮便許  
吹簫出禁闈賢聲咸畹流傳寡江敷無勞讓婚者賜花  
更得日兄憐投瓊特救行杯筆愛學江南淺淡妝脂田  
水碓厭豪強刻成小印柔荑撫鈴記居然寶繪堂鐘漏  
相催歲華擲一枝紅墜悲秦客朱綵冷落橋紐昏不共  
金箱殉梅額萬年誅德未足哀賊騎蹴踏都城摧壯哉  
都尉又死國碧血滴到珠襦灰青匱玩物今猶在無用  
摩挲博人愛為君試續學古編惆悵蟲鏤非千年

公主  
以愍

帝元年下嫁駙馬鞏永固  
十六年薨甲申鞏死難

題周兼南唐小周后寫真四首

未合雙鬟最小身秦淮明月白門春  
漢宮莫話昭陽事更有人間返卧人

已識君王尚待年新詞側艷外邊傳  
銷魂貌出提鞞樣壓倒南朝步步蓮

羣花偃亞小亭孤卯酒朝酣倦欲扶  
可記畫堂南畔見背人無語問流珠

命婦隨朝掩淚光虛聞龍袞紀興亡畫師自有春風筆

不寫傷心入汴梁

龍袞江南野史今所傳不全  
載小周后事見王銍默記

### 吳山咏古詩二首

麻曷葛刺佛

并序

麻曷葛刺佛在吳山寶成寺石壁上覆之以屋元至治  
二年驃騎衛上將軍左衛親軍都指揮使伯家奴所鑿  
紫元史泰定帝元年塑馬合吃刺佛像於延春閣之薇  
清亭下輟耕錄亦稱馬吃刺佛蓋梵音無定字故也元



時最敬西僧此其像設獐惡可怖志乘不載觀者多昧其所自故詩以著之

寺古釋迦院青滑石如飴何年施斧鑿幻作梵相奇五采與塗飾黯慘猶淋漓一軀儼箕踞努目雪兩眉赤脚踏魔女二婢相夾持玉顱捧在手豈是飲月支有來左右侍騎白象青獅獅背匪錦幪薦坐用人皮髑髏亂繫頸珠貫何纍纍其餘不盡者復置戟與鉞旁紀至治歲喜捨莊嚴資求福不唐捐宰官多佞辭我聞劉元塑妙

比元伽兒搏換入紫闥祕密無人知此像琢山骨要使  
千年垂徧翻諸佛名難解姚秦師游人跡罕到破殿蟲  
網絲來觀盡毛戴香火誰其尸陰苔久凝立想見初成  
時高昌畏吾族奔走傾城姿施以觀音鈔百定鴉青披  
題以樸橄筆譯寫蟠蚪螭照以駝酥燈深盥明流離供  
以刲羊心潔於大祀犧紅兕交膜拜白傘紛歲蕤琅琅  
組鈴語逢逢扇鼓馳到今數百禩眩惑生淒其但受孔  
子戒

元世祖命廉希憲受戒於國  
師廉對曰臣已受孔子戒

漫書膽巴碑

趙子昂  
延祐二

年奉命書膽巴帝師訪古為此作聊釋怪譎疑  
碑膽巴華言秘密

鐵四太尉并序

鐵四太尉在吳山東嶽廟廡下宋名中興觀像凡四軀  
擎拳瞋目醜怪駭人相傳江中浮來郡人有忿爭凶隙  
者則迎而詛之案凌彥翀柘軒集有吳山東嶽廟化鐵  
四太尉疏云吳山東嶽廟鐵四太尉一曰靈應侯二曰  
福祐侯三曰忠正侯四曰順祐侯以禦灾危以鐵肖像  
非一日矣因軍器造作有欲假為用者一夕託夢於王

子澄曰吾欲助國將作吾新像以離於此已而果為國  
用子澄識其語不忘果蒙神祐動止協吉欲求衆力圓  
成庶見神功昭著彥紳為至正末人像當重鑄於此時  
不知何年復增鑄一軀謚為五方之神俗名鐵哥而敝  
俗不可息矣

岱宗長五嶽秩祀百代舉仙釋爭傳會幽眇竟難距臨  
安宋行都寓祭亦名旅四尉知何神封號侯爵序治官  
巧范鐵面目黑如秬謚傳汎濤江風掀出沙渚奇事神

降莘里俗文詛楚慎匪金人銘誕將木甲侶

泰山上有木甲漢武

帝時神也見應劭漢官儀

唯有避俗翁皎皎載玉楮當年著靈功志

在捍疆圉不為錢可耕不為釜可煮願鑄為五兵廓如  
埽烽炬報貺重宵形爭傳夢中語斯事略足徵諾臯儻  
見許衝寒過琳宮虛廊竄松鼠

春雨有懷徐丈紫山湖上

以下戊申

老大逢春最殢春又經多雨洗芳塵官梅開後野梅落  
湖水滿時河水新無事長如耗磨日幾年不作踏燈人

相思只有師川在安得衝泥過比隣

同敬身東扶過雲居寺傷貞石下世

春色悲人事松門澹夕暉昔游同禮塔今望各霑衣一  
病驚才盡三生向佛歸傷心堦草合行跡尚依稀

春日湖上

閉戶皆無事貪游似不閒閨人看禁樹詞客入空山湖  
渌淺深際花催寒暖間春衣如可典拌與飲循環

二月十六日吳尺鳬招同袁舒雯沈藥城符幼魯

趙谷林意林杭大宗丁敬身包家山看桃花

天公愛花真不錯輕陰為花張帘幕城南火急三日游  
轟轟青山花繞郭符融喜接如雲談辛苦京塵乍抽脚

謂幼魯

折簡邀賓吳季子能使故人共斟酌錫簫羣幄柏

下集

游人競就  
顧氏墳

放眼終嫌少恢廓提壺取道梵天寺石

塔雙標聳蓮萼岡盤徑複趾造頂一上江天忽呈躍共

藉草茵勝翫觥古號桃關無鎖鑰

包家山宋時名桃花關榜曰蒸霞

堪

矜佳處人不知我取衆遺爭大噓綠楊圍屋菜繡畦千

樹萬樹紅約略峭風橫起野色暗恐蕩繁英被圻堦陽  
侯娛客更有意酒酣卷地春潮作分明石家錦障外搖  
動軟流離一箔烟中越岫儼彼姝晚倚嬌寒更梳掠我  
生窮悴何足嗟造物供人殊不薄景倩空為步屨至林  
宗漫有同舟約豈如我輩詩膽頑解使長雲雨還閣黃  
鸝三請花不語散作春愁紛漠漠

清明日出東郊至江上

江上人家綠滿林殘花無處避蹄涔清明時節孤帆雨



想見天涯倦客心

送春日同沈藥城趙功千游南屏四首

過雨山烟薄似紗  
截湖小艇遠聞蛙  
綠陰誰見春歸路  
借問僧家與釣家

竹籬苔磴摘青梅  
倒影風潭石面開  
不見故人汪十六  
渠倚闌無與試茶杯

邵家高冢竄香狸  
阜莢花中石獸危  
一種滄桑山鬼泣

奉香猶記永陵時

明昌化伯邵  
林墓在山下

短長橋外去忽忽瘦盡鶯花莫惱公明日重來看楊柳  
烟條萬一憶東風

答西岡明府見懷

罷舉我偏嬾去官君亦貧娛書清靜客多病愛閒人花  
落郊園晚詩題京洛塵相思勞遠道已歷幾冬春

懷樊榭孝廉

雲中鮑 鈐西岡

湖山春色早幽事閉門多且免書驢券何妨置雀羅  
青雲容俯仰白日任蹉跎官閣聯吟處於今跡未磨

題大宗松吹書堂圖

閱世翛然滌煩礪著書種松皆十圍居士散髮無散衣  
疎釵滿地開林扉翠蒙烟漏朝暉須臾動影颯欲飛  
風馭適從何處歸披薄纖末無停機鉶笙幽咽泉語微  
聽匪緣耳悟者希此中默喻理不違但將畫本付韋偃  
勿用談柄持張譏

四月十五日同施自勗吳尺鳬游西山入龍泓洞  
淺夏宜尋山幽深最靈鷲言瞻理公塔濃綠暗晴晝行

勝已十里地奧峯轉秀石牀不暇坐窈窕入雲竇乳泉  
排蜂房其下若懸雷絕疑秋雨時濺撲到襟裛圓穴居  
上頭晃晃天影漏照見壁間書亡國有餘詒洞刻咸淳  
丁卯賈似  
道同客俞  
斚等題名蒼然留後鑒反似神所守嬾姍出別洞冷襲  
袂衣透恨不裝輕絲佛國殊氣候

由永福寺左上白衲菴

鹹鹹羣峯圍嵐氣此長鎖花宮隱叢篁龍湫在其左山  
禽時驚飛高下新箨墮白足導我前細路殊硤礧蕭森

不見天連岡接松果何年置圓菴棟宇平帖妥入門忽  
破禪猩紈照榴朵山中欲知時結夏乃大可吾儕稱愛  
閒永日銷宴坐香餘青虬裊將斷猶婀娜寄語風埃人  
微言堪已瘳

石筍峯

西山下夕陽陰翳淒我神拾級愈斗絕苔滑除荒榛澗  
泉幽脩語回頭又無人摘摘叩竹戶童子知迎賓僧房  
如旋螺一上一境陳登樓望東嶺彩翠相鮮新林梢斷

崖口杯水浮湖漚請客參石筍樵路隨麕麇十丈未折  
設包孕太古春昔聞祖龍學結菴此嶙峋名僧耽幽趣  
遺礎今埋湮太息後來者何幸為州民

冷泉亭月夜

望月迎峯菴已吐鷺嶺背林間炯積雪搖影紛瑣碎出  
門路漸低步步入幽靄過橋松露滴茅屋一犬吠層巒  
凹復凸月尚隱其內招要坐空亭萬木鬱垂蓋泉光動  
深池翻疑夜當晦聞聲彌覺靜澗韻雜陰籟微於交枝

隙忽見鮮雲挂此時各無語翹首翠屏對颯然古精靈  
髣髴妙景會烟中客兒句風外寶公吟欲留凜生寒將  
去如有待今宵單牀夢猶繞琉璃界

迎峯菴曉起冒霧出山

敲枕鳥喚客曉望意必佳開窗墮茫茫悵與始願乖遂  
辭已公屋勇縛雙青鞵前村十重障不見沽酒牌近寺  
溼紅隱孤塔空翠埋霏林漸成雨覆磴疑無厓霑衣不  
足惜前進如推排須臾清風至湖水鏡面揩夷猶縱一

權安坐相談諧人生本何異俯仰殊所懷

雨中集秋聲館觀唐于府君墓志銘甄

梅雨澌澌守環堵書客無悰遠相聚比隣唐甄未成土  
呼童盥手為迎取縱廣盈尺製樸古厚徑三寸半蝕腐  
于君昌嶠字光宇貞元朝士誰比數場有小鋪司瀉鹵  
奉公夕惕亦矜許井邑缺一嗟薄祜四十字并韻所譜

四十作卅先  
立切本唐韻

終于家堂臯某甫葬之大墓厥子五小猶

懸角語悽苦

總作懸  
亦唐韻

文簡而該較繁愈剝如弦蟾翳復



吐新亭山陽幾風雨近人掘自青枝塢湖影冥濛失封  
樹千年見日闢幽戶阿紫元駒鬱餘怒織烏西飛誰作  
主發邱中卽當貸汝戕戕秦亭名可補

吾杭無新亭山  
青枝塢正在秦

亭山之南則秦  
亭古名新亭也

圖經續者勢黜黜墨響手拓好藏弃遠

勝金臺尋石鼓

移居

生涯仍往日俗累復今年半宅從人典

方萬里桐江續  
集有典半宅詩

余適同之全家冒雨遷栽花無隙地汲井有新泉差喜東城

近蕭疎野趣便

六月一日午睡夢程友聲醒時見壁上懸垂虹樣  
權圖乃友聲為余作者

守窮故鄉居畏暑蓬戶閉風慢小眠齋借作涼雲翳故  
人千里駕良覲已隔歲落落知無營不問別來計茶米  
俄欲陳驚起厭蟬嘒睨壁得新畫一角題字細帆色八  
渺茫峯遠秀于髻寫我汎春寒長橋望雲霽烟墨闌性  
靈絕境得精詣始悟夢為因匪直思發嚏

苦熱夜坐

晴電忽穿樹好風微動萍移牀池上坐相識有流螢

雨後

返照殘雲歛柴門似水清蘆梢分渚響瓜蔓過牆生在  
昔三騶飲傳聞五鼎烹野夫欣雨足米價及時平

初秋同聖幾坐皋園二首

秋水今何似平添碧半篙澄陰交翳樹風色曲通壕蓮  
飈無多葉鷗翻有落毛為驅殘暑去扇影已辭勞

三徑頻過後烟蕪更勝初難消熱客愛合借野人居黑  
蝶秋棠睡青蟲敗葉書不知何所得歸意屢躊躇

秋霽同蔣丈靜山東皋散步

雨收林露水平池疎豁何妨步履遲淡日青門松葉圃  
涼風白屋槿花籬閒尋壞衲安禪處記捕鳴菴下學時

秋思蹉跎吾已慣先生莫怪鬢邊絲

費袞梁溪漫志吳中以八月露下而

雨為林  
露雨

秋夜有懷葭白板江秋玉佩兮

淮南三載住追憶忽今宵舊句開還掩秋燈短更挑烟  
明念佛菴葉下擣衣橋多少閒蹤跡相思逐暗潮

八月十八日同丁敬身游龍華寺尋石壁上宋人  
題名登慈雲嶺觀永壽院宋仁宗佛牙讚吳越摩

崖篆字

城南丁隱君嗜古有神契山心本清虛詩骨不柔脆約  
我緣江行驕陽竹傘蔽遷迤峯覆釜參錯樹排齊斜徑  
通烟蘿仰見巖壑麗雙林昔傳公全身此中瘞漁竿亦

通禪蕭散久順世入門松影轉殿址秋草翳釋子茅蓋

頭供客馥叢桂舉似藕絲燈莫辨蕭氏製

蔡條鐵圍山叢談錢塘龍

華寺有傳大士真身塔及敲門椎誦金剛經拍板藕絲燈三物藕絲乃梁武帝時物也所織紋實華嚴會說法相有天人鬼神龍象宮殿之屬政和後索入九禁惟聞蒼壁下古字徧深鏤驚

喜極逾量綫路怵子細披荆復拜竹習勇我能繼下窺

臨伏檻上覩攀埤堦向無剜苔人堙沒八分隸弓韞祠

高祿牲玉祀上帝卦媵遺園壇仁祠想禮範其他紀遊

者北南宋更遞完好十得五姓名屈指計汗簡不可磨

沈碑反為贅猶令後來輩挾別認書勢

紀游題名有司馬池周駿潛說

友徐理等南郊齋宿題名有京鏜表說友李壁陳自強錢象祖謝深甫何澹張巖等缺落尚多

體勞坐

少休拭汗翠霑袂嶺路近見招餘氣鼓尤銳江色懸虛

寮泉花滴螺髻仁皇頌金骨排儒說滋弊大書摩雲根

作偽殆如竊

永壽院石上刻宋仁宗佛牙讚七律一首考宋僧法雲翻譯名義釋舍利下亦引此

讚其詞鄙陋蓋假託為之

偉哉武肅勲伐山行旅患不獨築塘木爰

合既未濟森然垂玉箸尚紀卯申歲英雄官臣賊圖霸

聊自衛首題礪山朱如裂昭諫皆

慈雲嶺崖上篆刻云梁單闕之歲興建龍

山至泥灘之年開慈雲嶺便建西關城宇臺殿水閣今  
勒貞珉用紀年月甲申歲六月十五日吳越國王記共  
四十九字田氏西湖志止載首十八字考單閼為梁朱  
溫開平元年泥灘為乾化二年甲申則後唐莊宗同光  
二年蓋吳越所得俱不訾何啻三品幣重來攜匹紙璫  
武肅王所題

椎拓次第當作天龍游窮搜發幽滯九日以為期勿悵

巖扉閉

舟泊西林橋同吳尺鳧作

裏湖涼思不勝飄路轉青林接野橋游女能來秋照影  
篙師解事小停橈風過殘葦疎還響雲襯晴峯淡欲消



卻為流連忘日暮醉中翻覺水天遙

九月一日同丁敬身張希亮金以寧符聖幾游天  
龍寺石壁上有太平興國六年心經門外八卦田  
即宋郊壇故跡次登天真寺靈化洞側刻字云梁  
龍德元年歲次辛巳十一月壬午朔一日天下都  
元帥吳越國王鏐建置錢王拜郊臺也此寺登眺  
最為江山勝處

山勢龍飛護佛場後游佳處未渠央寫經某甲存荒壁

迎客單丁到上方滿眼雲濤看起滅接天草樹管興亡  
蕭然欲下催詩雨相送沿村稻半黃

秋寒

前日驕陽尚滿林天機陡轉冷光侵蕭森已識閒中味

淒緊初關別後心

時送藥城  
幼魯北行

四壁圖書溫破帽千家簾

幕促疎砧多情那得如韓偓灑背微霜擁鼻吟

上冢

十月鄉山上冢天晴光盡趁過湖船鵲啼鶴返空千載

宿草寒松又一年胡笳攜尊成黯淡龐公孖伴故流連  
愁來寶石峯頭望城裏人家自夕烟

十一月十二夜月同黃松石張情田散花灘閒步  
用句曲外史馬騰新居韻

林影灘光靜自如向寒人意轉清疎真疑落木臨皋路  
更憶浮暉雪上居烟外有山渾入夢月中著句未曾書  
歸來短髮飄蕭甚敲火石橋聞夜漁

淮南子云月之光  
可以遠望而不可

以細  
書

同尺鳬敬身過湖登慈雲嶺觀廢石龍淨勝院崖  
上北宋僧冲羽書唐右補闕梁肅心印銘下方家  
峪尋劉娘子寺已廢惟鳳凰泉猶存飯於觀音洞  
僧舍而歸得詩三首

招手湖南畔平蕪淨可親霧窺山半面水照鶴雙身野  
艇容茶具長橋響釣輪慈雲三度謁也勝埽門人  
畏險須扶掖上頭雲倒飛寒林正搖落幽趣得因依龍  
蛻莓崖積狐蹤莽徑微劉銘辨溫媼彈指昔游非

禪棲誰再構  
妃子有前蹤  
竹影思遺帔  
泉根沒廢鐘  
飯餘香印斷  
樵罷漆燈逢  
勝得啼鳥在  
年年怨此峯

趙谷林以汎湖看梅詩見示意林復以詩送梅枝  
次韻奉答共四首

今年司冬大妍暖  
梅樹已發臘前枝  
一梢正透竹陰出  
只欠王家雪下時

甕頭香熟莫逡巡  
處處蜂須色鬪新  
自笑先生東郭宅  
冷雲滿硯未知春

共載詩蓬泝遠汀  
小紅鈿破雨冥冥  
催人無奈易頭白  
伴鶴有情還眼青

君家山閣水亭邊  
衝曉數花明  
遠天有伴新詩遣  
春至一時香韻兩無前

題松風流水圖

落落松陰寥寥天宇希  
微之聲風與水伍  
惟石巖嶢伊人歸處  
易妙無言琴高不鼓

樊榭山房集卷五